



**Su pinnetu
unu fràigu
galu presente
in su territoriu
de Romana.**

Atividade contivigiada dae Lucia Sechi
progetu: "Sa limba sarda in sos usitzios e in totue "annualidade 2021

Bi nd'at medas mescamente in sos giassos in ue nd'aiant segadu sos àrvures (Serras e Cunzadu) in ue, serrende cun sas muredinas bìculos de terra, si semenaiat puru in logos chi daiant pagu frutu. Carchi pinnetu s'agatat intro de unu cunzadu inghiriadu dae muros a sicutu, àteros sunt a curtzu a un'arzola subra de sa roca, àteros a parte de intro remonint su cubone, su lacu pro binnenare, iscavadu intro de sa roca. Si bi remonian sos trastes de traballu e fiant un'amparu pro chie traballaiat e drommiat puru in campagna. Pro su prus a sos fràigos cun sa cobertura de pedra lada lis narant pinnetos, a cussos cun sa cobertura de frasca e ratos lis narant pinnetas.

Max Leopold Wagner, nòdidu linguista tedescu, chi aiat atraessadu e istudiadu bene tota sa Sardigna descriet gasi custu fràigu: sos pastores chi istant tempus meda in sa tanca e torrant a sa bidda e a sa famìllia solu sa domìniga, fràigant in su logu de su pàsculu unu fràigu de pedras postas a sicutu una subra de s'àtera comente unu nuraghe minoreddu; de frecuente custas pinnetas sunt tundas e sa cobertura est de frasca e ratos ligados in artu.....a manera de formare unu conu minoreddu.....Custos fràigos de sos pastores in tota sa Sardigna los giamant pinneta e in carchi logu pinnetu.....a parte de intro sa pinneta est galu prus sèmplitze de sas domos. Puru inoghe b'est su foghile in mesu; in sos muros sunt apicados sos trastes pro mùnghere e su fusile; intro de die inoghe sunt arrumbadas sas istujas pijadas chi a de note s'isterrent a curtzu a su fogu; dae su muru nde calat, rèzidu dae bator cannaos, unu cannitu pro remonire su casu e puru àteras cosas.....

PIGA G.S. e ASS. SAS AMORADAS DI ROMANA, Usi e consuetudini Tradizioni e forme espressive di Romana, Soter editrice 2000 Villanova Monteleone

WAGNER M. L. La vita rustica, II ristampa 2011, ILISSO EDIZIONI-Nuoro